

摘藻堂四庫全書薈要

經部

欽定四庫全書薈要

經部

御纂詩義折中卷八




欽定四庫全書薈要卷一千八十二

經部

御纂詩義折中卷八

陳風一之十二

陳國名在禹貢豫州之域帝舜之後閼父爲周陶
正武王以元女太姬妻其子滿而封於陳與黃帝
帝堯之後共爲三恪

子之湯兮宛丘之上兮洵有情兮而無望兮

賦也湯與蕩同宛丘地名洵信也望人所瞻仰也陳

國無政在位者皆遊蕩於宛丘之上國人譏之以爲
雖有情致而無威望也毛傳曰子大夫也

坎其擊鼓宛丘之下無冬無夏值其鷺羽

賦也坎鼓聲值植也鷺鳥名其羽可以爲翳舞者之
所持也

坎其擊缶宛丘之道無冬無夏值其鷺翮

賦也缶瓦器可以節樂翮翳也徐常吉曰古者春秋
教以禮樂冬夏教以詩書今冬夏值其羽翮則無時

而不舞矣此書所謂恒舞也

宛丘三章章四句

宛丘陳人刺其上也昔胡公之封於陳也武王
妻以元女太姬太姬好巫覡之事相沿成俗故
在位者多敖遊而恒舞夫其遊而舞也亦有託
而云然以爲有情也且謂情之所鍾不妨越禮
而不知無威儀之節則不足以定命無莊涖之
容則不足以觀民有情無望非小失也古今才

士有文而無行其病皆在於此讀宛丘之詩其
亦可以自儆也夫

東門之枌宛丘之栩子仲之子婆娑其下

賦也枌白榆也栩樹名子仲氏也子仲之子貴族之
子也鄭康成曰之子男子也婆娑舞貌何楷曰或舞
於東門之枌下或舞於宛丘之栩下明其非一時非
一處也

穀旦于差南方之原不績其麻市也婆娑

賦也穀善也穀旦良辰也差擇也高平曰原范祖禹
曰民於善日則擇高明之地而荒樂焉是也不績其
麻廢女工也市易也彼此交易而舞故曰市也

穀旦于逝越以駿邁視爾如蒞貽我握椒

賦也逝往越於駿衆邁行也言穀旦往遊不暇擇地
但視人衆之處而行焉則遊愈勤而志愈荒矣蒞荊
葵也椒芬芳之物也越以衆邁男女會矣於是男悅
女曰視爾之貌如蒞華然女遂貽以一握之椒而通

情好也此與鄭之采蘭贈芍同俗故詩人叙其事而醜之也

東門之枌三章章四句

詩序曰東門之枌疾亂也疾其嬉遊而至於淫亂也昔先王之教民也君子勤禮小人盡力傳曰民生在勤勤則不匱又曰民勞則思思則善心生逸則淫淫則忘善忘善則惡心生今陳之俗恒舞酣歌在民上者無冬夏而值其鷺羽其

下化之越駿邁而市也娑娑則是上不勤禮而
下不盡力也有男不耕孰授之食有女不績孰
授之衣女遊而冶必至誨淫男惰而貧或至爲
盜是不勤致匱忘善而惡心生也立國如此何
以長世君子是以知陳之先亡也

衡門之下可以棲遲泌之洋洋可以樂飢

賦也衡門橫木以爲門也棲遲止息也泌水名洋洋
流動之貌朱子曰此隱居自樂而無求者之詞言衡

門雖淺陋而亦可以遊息泌水雖不可飽然亦可以
玩樂而忘飢也

豈其食魚必河之魴豈其取妻必齊之姜

賦也姜齊姓飲食男女人大欲存焉故以食魚取
妻概其餘也

豈其食魚必河之鯉豈其取妻必宋之子

賦也子宋姓豈其必者有亦不却無亦不求志有在
而不暇及乎此也

衡門三章章四句

衡門守道也人之有欲也皆期其必得必欲得而不得於是乎目前之境皆以爲不可不知境不同而道同得其所以處之之道則境無不可而道外之物皆可以不必是故衡門泌水人所難安而心以爲可則可矣道固無不在也魴鯉姜子人之所欲而心以爲不必則果不必矣於道無加損也此則所謂素位而行不願乎外者

與可以無入而不得矣君子哉

東門之池可以漚麻彼美淑姬可與晤歌

興也漚漸漬也鄭康成曰於池中柔麻使可緝績以作衣服興賢女能柔順君子成其德教也晤猶對也言淑姬賢女君子宜與晤對詠歌相切化也

東門之池可以漚紵彼美淑姬可與晤語

興也紵麻屬答述曰語晤語者迭爲問對相辨論也東門之池可以漚管彼美淑姬可與晤言

興也管草名可以爲索自述曰言晤言者各陳己意互証明也

東門之池三章章四句

東門之池思賢妃也人君之德以養而成非一日之積也陳之爲國舊矣太姬之初已有巫風繼世之君必有恒舞於宮酣歌於室者以爲非此無可與娛也諍臣直言謂宜不邇聲色則格而不入矣詩人思有以易之以爲誠得賢媛相

晤與歌與言如池水之漚麻漸漬而不覺久而
化焉則自知巫覡之紛若不如淑姬之幽閒庶
幾以琴瑟之靜好易羽翮之婆娑矣然而豈易
得哉此關雎之君子所由寤寐思淑女也

東門之楊其葉牂牂昏以爲期明星煌煌

賦也牂牂盛貌煌煌大明也此與人有約而不信也
東門之楊所約之地也昏以爲期所約之時也如期
俟之至於明星已出而不來是失信而爽約也

東門之楊其葉肺肺昏以爲期明星晢晢

賦也肺肺密貌晢晢小明也將曉則星光微矣

東門之楊二章章四句

東門之楊刺無信也人之生也信義爲大以義
相約加之以信久要不忘所以爲成人也世之
衰也人棄信而忍於作僞離騷云曰黃昏以爲
期兮羗中道而改路亦猶是矣人情反覆可勝
歎哉故君子之與人約也必審其所約之事必

擇其與約之人思其終也思其復也思其反也
誠慎之也

墓門有棘斧以斯之夫也不良國人知之知而不已誰
昔然矣

比也棘惡木斯析也夫謂陳佗也已去也誰昔猶疇
昔也陳佗欲俟桓公之卒而作亂是墓門之棘也墓
門有棘則宜斧以斯之乃佗之陰謀國人皆知而卒
不能去蓋自疇昔已然非一日之積矣追咎桓公也

墓門有梅有鴉萃止夫也不良歌以訊之訊予不顧顛
倒思予

比也梅美木鴉惡鳥訊告也蘇轍曰墓門有梅而鴉
集之梅雖美將得全乎以比桓公雖有太子免以爲
後而佗在焉欲其無危不可得也歌以訊之告桓公
也告之而不顧至於顛倒而後思予則已晚矣其後
佗果殺免也則詩人之先見爲不可及矣

墓門二章章六句

詩序曰墓門刺陳佗也左傳隱公七年陳五父如鄭涖盟軟如忘洩伯曰五父必不免不賴盟矣是佗之不良國人知之鄰國亦知之而陳侯不知不明也知而不已不斷也不明不斷何以定亂是故歌以訊之望其明也斧以斯之望其斷也

防有鵲巢邛有旨苕誰侮予美心焉忉忉

比也防堤也邛邛也旨美也苕草名好生下隰侮誑

也忉忉憂也鵲巢於大樹防以止水安有鵲巢苔生
於下隰邛乃高丘焉有旨苔今皆謂有之以比讒人
駕爲無實之詞以欺人所謂侮也誰如此以侮予心
之所美使我忉忉憂之也

中唐有甃邛有旨鵲誰侮予美心焉惕惕

比也唐廟中路名甃瓴甃也俗謂之磚鵲小草雜色
如綬惕惕懼也上章言以無爲有此言似乎有之而
實羅織其事也歐陽修曰中唐有甃非一甃也以積

累而成路旨鵲綬草雜衆色以成文猶多言交織以成惑是也其侮更巧故憂之甚而至於懼也

防有鵲巢二章章四句

詩序曰防有鵲巢憂讒賊也夫讒賊亦多術矣防巢卽荅本無其事而妄謂有之所謂譎張爲幻也唐鑒卽鵲集衆小事而遂張大之所謂萋菲成錦也家國之際讒言一興變故百出誠可畏也書曰無稽之言勿聽謂人之多言苟非確

有証據概斷之以勿聽則讒賊止矣

月出皎兮佼人僚兮舒窈糾兮勞心悄兮

賦也皎明也佼美也佼人謂夏姬也僚好貌舒夏徵舒也古人二名間有截用一字者如晉重耳傳謂之重樂王鮒傳謂之鮒仲孫何忌經謂之忌是也陳靈公與孔寧儀行父淫於夏氏夏姬之子徵舒恥之故弑靈公此詩言當月出之時靈公悅夏姬之佼好而其子徵舒幽窈糾結勢必爲亂故中心憂勞又悄然

而不敢言也

月出皓兮佼人懽兮舒懽受兮勞心慄兮

賦也皓月光白也懽美而清也懽受憂思而忍受也
慄煩亂也悄然不言而中心煩亂不知所爲也

月出照兮佼人燎兮舒夭紹兮勞心慘兮

賦也照月光照人面也燎人面亦有光也夭矯變紹
糾緊慘哀痛也言其憂思而忍受者今天變而糾緊
則禍發甚速故煩亂者至於哀痛知靈公之必不免

也

月出三章章四句

月出憂靈公也淫之爲禍烈矣淫人之女如其父何淫人之妻如其夫何淫人之母如其子何當其月皎人僚色授魂予之時而環伺而欲及之者已不可勝計矣聖人錄月出使淫亂之人知懽愛愈甚則禍機愈烈庶幾有畏而中止非徒播靈公之惡於衆也

胡爲乎株林從夏南匪適株林從夏南

賦也株林夏氏之邑也夏南徵舒之字也朱子曰靈公淫於夏氏朝夕而往其民相與語曰君胡爲乎株林乎曰從夏南耳然則非適株林也特以從夏南故耳蓋淫乎夏姬不可言也故以從其子言之詩人之忠厚如此

駕我乘馬說于株野乘我乘駒朝食于株

賦也說舍也馬六尺以下曰駒說于株野者暮來而

不返也朝食于株者未暮而即來也駕馬乘駒往來
不息朝朝暮暮流連不已何爲也哉則不必問而可
知矣

株林二章章四句

詩序曰株林刺靈公也朱善曰衛之亂至牆茨
而極於是有狄入衛之禍陳之亂至株林而極
於是有楚入陳之禍然則狄非能入衛也宣姜
實召之也楚非能入陳也夏姬實召之也此所

謂女戎也比事以觀可以爲淫亂者之戒矣

彼澤之陂有蒲與荷有美一人傷如之何寤寐無爲涕泗滂沱

興也陂澤障也荷芙蕖之葉也美人賢人也澤陂之草兼有蒲荷以興國中之美止有一人也夫有美一人可謂少矣又棄而不用則其傷心當如何哉無可如何故寤寐無爲但見其涕泗滂沱而已此如賈誼之痛哭流涕實有所不容已也

彼澤之陂有蒲與藺有美一人碩大且卷寤寐無爲中
心悁悁

興也藺蘭也碩大壯盛也卷春戀之意言忠君也碩
大而且忠君授之以事宜無不肯爲者乃寤寐無爲
但見其中心悁悁而已悁悁猶拳拳也

彼澤之陂有蒲菡萏有美一人碩大且儼寤寐無爲輶
轉伏枕

興也菡萏芙蕖之花也儼矜莊之意言敬事也碩大

而且敬事授之以事宜無不能爲者乃寤寐無爲但見其輾轉伏枕而已涕泗滂沱急欲爲也惛惛不忘爲也伏枕則無志於爲矣傷之至也

澤陂三章章六句

澤陂傷時也靈公荒淫泄冶諫而殺之諫臣被殺則忠臣束手傷心涕泣而末如之何故寤寐無爲也夫天下之事天下之人爲之也或有事而無爲之之人或有人而不得爲其事如此詩

之美人碩大卷儼才足有爲且急欲爲事至於
流涕而事卒不可爲乃至無爲而伏枕所謂雖
有善者亦無如之何也故變風終於陳靈天下
之亂至此而極矣

陳風十篇二十六章一百一十四句

檜風一之十三

檜國名在豫州外方滎波之間周武王封祝融之
後於此鄭武公滅之而遷國焉

焦裘逍遙狐裘以朝豈不爾思勞心忉忉

賦也逍遙閒適也此君子去國而思其君也言焦裘以燕居狐裘以視朝衣服容止宛然在目豈能不爾思乎所以決於去者以朝無善政故我心忉忉而不能安也毛傳曰國無政令使我心勞是也

焦裘翱翔狐裘在堂豈不爾思我心憂傷

賦也翱翔遊行也堂路寢也人君日出視朝退適路寢以聽大夫所治之政在堂者但在而已無所設施

故我心憂傷也

羔裘如膏日出有曜豈不爾思中心是悼

賦也如膏潤澤而明也有曜照之有光也但華其衣服而不勤於政治故君之服愈美而我之心愈悼也
羔裘三章章四句

詩序曰羔裘大夫以道去其君也夫華其衣服逍遙翱翔皆細故也而君子去之者以道揆之也好華麗則日即於奢喜燕居則日習於怠奢

者敝政之首而怠者積惡之原君子觀微而知
著故決然去之也去之而猶思之不忘君之恩
也思之而以去之故告之猶冀君之悟也故曰
以道去其君也

庶見素冠兮棘人樂樂兮勞心惓惓兮

賦也庶幸也縞冠素紕既祥之冠也棘瘠也季本曰
棘葉少而枝瘦故謂居喪骨立者爲棘人也樂樂毀
瘠之貌輔廣曰素冠樂樂情與服稱也惓惓憂勞之

貌世衰禮廢不行三年之喪故祥以後之衣冠不復見矣賢者遭喪欲復古禮而獨行無助思得一素冠
樂樂之棘人與爲同志而不可見故勞心博博也

庶見素衣兮我心傷悲兮聊與子同歸兮

賦也素冠則素衣矣思而不見故傷悲也欲與同歸
愛慕之詞也

庶見素韠兮我心蘊結兮聊與子如一兮

賦也韠護膝朱子曰韠從裳色素衣素裳則素韠矣

蘊結思之不解也與子如一甚於同歸矣

素冠三章章三句

詩序曰素冠刺不能三年也夫三年之喪天下之通喪也賢者俯而就不肖者跂而及檜國之俗不行此禮久矣舉國不行而莫以爲非一人行之而反以爲怪賢者思一同志之人而不得故憂之也勞心惓惓非虛語也凡人之心根性而動父母之愛天性也性之所動心不容已故

未見而傷悲蘊結其心實有所不安也既見而
同歸如一以爲必如是而心乃盡也先王制禮
亦因是心而已豈強民而爲之哉

隰有萋楚猗儺其枝夭之沃沃樂子之無知

賦也萋楚羊桃也猗儺柔美也夭少好貌沃沃光澤
貌子指萋楚也朱子曰政煩賦重人不堪其苦歎其
不如草木之無知而無憂也

隰有萋楚猗儺其華夭之沃沃樂子之無家

賦也樂無家者苦有家之累也

隰有萋楚猗儺其實夭之沃沃樂子之無室

賦也一門之內曰家夫婦所居爲室樂無室者併不能養其妻也

隰有萋楚三章章四句

隰有萋楚民不樂生也夫人懷五常之性爲萬物之靈誰甘於冥然無知者且有心知則必有情欲聞以未有室家爲苦矣未聞以無室家爲

樂也。養楚之民，樂無室家困之至矣。言其樂深於訴其悲也。其所以致此者，豈無故哉？故君子聞安樂之音，思仁政之所以造福；聽哀苦之言，思虐政之所以斂怨。則爲法爲戒之心油然而興矣。

匪風發兮，匪車偈兮。顧瞻周道，中心怛兮。

賦也。發揚起貌。偈，疾驅貌。鄭康成曰：周道，周之政令也。怛，驚動也。朱子曰：言常時風發而車偈，則中心怛。

然今非風發也非車偈也特顧瞻周道思念王室故
中心爲之怛然耳

匪風飄兮匪車嘌兮顧瞻周道中心弔兮

賦也飄回旋也嘌漂搖不安之貌弔悲悼也有傷今
思古之意矣

誰能亨魚漑之金鷺誰將西歸懷之好音

興也亨烹同漑滌也鷺金屬西歸歸於西周也朱子
曰誰能亨魚乎有則我願爲之漑其金鷺誰將西歸

乎有則我願慰之以好音以見思之之甚但有西歸之人即思有以厚之也

匪風三章章四句

匪風思西周也鄭桓公寄孥於虢檜之間武公繼桓公爲平王司徒乃得虢檜之地而徙封焉是東遷之初虢檜猶在也檜之君子覩平王之政令非復文武之舊是以中心怛弔而思西歸也夫其思西歸者非直爲河山之固也蓋爲惠

鮮懷保西周之所以撫其民者東周不復見矣
禮樂征伐西周之所以經其世者東周不復存
矣故慨然興懷欲以文武之道治之也已不能
歸而思能歸之人則其所懷之好音必天下之
至計而惜乎當日未有聞之者也

檜風四篇十二章四十五句

御纂詩義折中卷八

欽定四庫全書薈要卷一千八十三

經部

御纂詩義折中卷九

曹風一之十四

曹國名在兗州陶邱之北周武王以封其弟振鐸
蜉蝣之羽衣裳楚楚心之憂矣於我歸處

比也蜉蝣蟲也俗名浮生浮生之生爲時甚暫其羽
整潔如衣裳之楚楚以喻人之修飾衣裳者有似蜉
蝣也君子心有憂焉欲其從我而得所歸庶乎可以

久處也處安也得所歸則身安也

蜉蝣之翼采采衣服心之憂矣於我歸息

興也采采華彩也息靜也得所歸則心靜也

蜉蝣掘閱麻衣如雪心之憂矣於我歸說

興也閱與穴通管子曰掘閱得玉是也掘閱之本色
並無所謂楚楚采采也於是而悟性近習遠則可息
處并可說駕矣

蜉蝣三章章四句

蜉蝣閱世也玩細娛而忘遠慮非僅蚩蚩之氓
爲然矣其恃以不朽者何在孟子曰萬物皆備
於我矣顧人各有我而迷者不悟矻矻窮年究
不得其所歸則至人之心憂何時已哉

彼候人兮戈與祿彼其之子三百赤芾

賦也候人道路迎送之人何與荷同祿也赤芾冕
服之韠也大夫以上服之候人荷戈及爲赤芾者前
導也言其榮也三百言其多也朱子曰晉文公入曹

數其不用僖負羈而乘軒者三百人其謂是與

維鵜在梁不濡其翼彼其之子不稱其服

比也鵜水鳥能入水以取魚在梁而不濡其翼以比人之在其位而不盡其職也不盡其職則不稱其服矣

維鵜在梁不濡其味彼其之子不遂其媾

比也味喙遂稱媾寵也不濡翼魚在水中不入取也不濡味魚在水面亦不啄也以比人之居其位而不

事其事也如是則有負君之寵遇矣

薈兮蔚兮南山朝隲婉兮變兮季女斯飢

比也薈蔚盛多貌隲升也婉變柔順貌季女少而未
字也朱子曰薈蔚朝隲言小人衆多而氣燄盛也季
女婉變自保不妄從人而反飢困言賢者守道而反
貧賤也

候人四章章四句

詩序曰候人刺近小人也國家之爵祿原以待

君子非以予小人一予小人則爵祿不足以爲
勸矣且小人進則君子必退小人之進者愈多
則君子之退者愈困朝廷之用舍盡與草野之
好惡相反則其國可知矣魏之伐檀君子有其
功而無其祿小人有其祿而無其功曹之候人
小人居其位而無其德君子有其德而無其位
二國之政令相同而其危亡亦相似觀於此者
可以鑒矣

鴈鳩在桑其子七分淑人君子其儀一分其儀一分心如結兮

比也鴈鳩布穀也含哺其子朝從上而下暮從下而上均平如一也淑善也淑人君子以善養人之君子也儀禮也鴈鳩在桑而其子有七以比王者宅中御宇而衆建諸侯也諸侯雖衆而王者相待之禮儀均平如一如鴈鳩之哺其子也夫其儀之一者非外飾也王者之心視天下爲一家視萬民爲一體以治萬

民者惟諸侯故其心與之固結而不解也治本於禮
禮本於仁心結斯儀一儀一而天下定矣

鴈鳩在桑其子在梅淑人君子其帶伊絲其帶伊絲其
弁伊騏

比也騏青黑色也鴈鳩在桑而其子異處以比王者
居京師而諸侯各居其國也梅美木也其子在梅喻
國治也諸侯能治其國則天子無爲而治但見其帶
絲弁騏恭已垂裳而已蓋治戒其紛更而心防其驕

泰故無爲者所以養無事之福而恭己者所以清敬
事之原也

鴟鳩在桑其子在棘淑人君子其儀不忒其儀不忒正
是四國

比也棘惡木也忒差也其子在棘國難治也諸侯不
能治其國亦不必遽有兵刑之加仍以禮治之而已
等威嚴而使不敢僭予奪當而使不敢肆天子之儀
不忒則諸侯各謹其度而四國正矣蓋儀之一者非

無別而槩施之也賞善罰惡使之同歸於正故其儀
有時不一而未嘗忒也不一而不忒乃所以爲至一
也

鳴鳩在桑其子在榛淑人君子正是國人正是國人胡
不萬年

比也榛衆木也其子在榛如常者也諸侯亦不必有
奇才但安分守職則宣天子之德以臨其民而四國
之人皆歸於正矣正是四國所謂百辟其刑之也正

是國人所謂四方其訓之也至於四國之人皆沐天子之仁則普天之下同祝一人之壽君子萬年保其家邦所必然也

鴈鵠四章章六句

鴈鵠思聖王也曹叔振鐸太姒之少子也親承文王后妃之訓習觀武王成王之政而深識治化之原意曹之人猶有聞而知之者故鴈鵠之所言與二南無異也心如結兮所以正心也帶

絲弁騏所以修身也正是四國則家齊國治而天下平矣心結儀一所以明明德也正是國人所以新民也胡不萬年則新命矣蟬螭揭大道之要鴈鳩敷至治之澤三代以上之學猶可想見焉讀者不可不盡心也

列彼下泉浸彼苞稂愜我寤歎念彼周京

比也冽寒也浸漬也叢生曰苞稂莠屬周京周之西京也周自東遷之後王命不行於諸侯大國行虐政

以侵害小國如寒泉之浸苞稂不滋其生而反傷之
詩人有感於此故愾然寤歎念周在西京之時未嘗
有此事也案曹共公之時晉侯初伯執曹伯畀宋人
又分其田後乃以賄免若四國有王豈至此哉

冽彼下泉浸彼苞蕭愾我寤歎念彼京周

比也蕭蒿也稂猶害穀蕭則野生而已而寒泉亦浸
之以比當時小國有罪無罪皆不免侵削也京周西
京之周也西京之周不同於東遷之周也

冽彼下泉浸彼苞蓍愾我寤歎念彼京師

比也蓍筮草也利用前民勝稂蕭遠矣而亦被浸以
比當時小國亦有賢君而終不得免也京大師衆也
念西京之大衆足以鎮服四國也

芄芄黍苗陰雨膏之四國有王郇伯勞之

比也芄芄美盛貌郇文王之後左傳曰畢原豐郇文
之昭也郇本侯爵稱伯者爲州伯也竹書載昭王六
年王錫郇侯命是以郇伯繼召伯也言西周之時天

下之民咸被王澤如芄芃之黍苗又有陰雨以膏之也其所以膏澤下逮者由四國諸侯皆知有王無敢自專而王又命邠伯甸宣以勞來之是以大國之虐政不行小國咸樂其生而傷今之不然也不思召伯而思邠伯者是時邠入於晉矣以見晉侯居邠伯之地而不能繼邠伯之業也故曰五伯者三王之罪人也春秋之作傷天下之無王與詩人有同心矣

下泉四章章四句

詩序曰下泉思治也程子曰易剝之爲卦也諸陽消剝已盡獨有上九一爻尚存如碩大之果不見食將有復生之理上九亦變則純陰矣然陽無可盡之理變於上則生於下無間可容息也陰道極盛之時其亂可知亂極則自思治故衆心願戴於君子君子得輿也詩匪風下泉所以居變風之終也陳傳良曰亂極而不治變極而不正則天理滅矣聖人於變風之末係以思

治之詩以示循環之理言亂之可治變之可正也

曹風四篇十五章六十八句

豳風一之十五

豳國名在雍州岐山之北棄爲后稷封於邠其子不窋失官而竄於戎狄之間不窋之孫公劉能復修后稷之業乃相土地之宜而立國於豳周公以成王未知稼穡之艱難述后稷公劉之化作七月

之詩謂之豳風後人又取周公所作及凡爲周公而作者附焉

七月流火九月授衣一之日鶩發二之日栗烈無衣無褐何以卒歲三之日于耜四之日舉趾同我婦子饁彼南畝田畯至喜

賦也火心星也六月火昏中至七月則流而西也九月霜降天始寒婦功成授衣之候也一之日一月之日也周正以建子之月爲一月也變月言日以別於

夏時也。膚發風寒栗烈氣寒褐毛布也。于徃耜田器也。饁餉之也。田畯勸農之官也。此章言幽先公之教其民也。衣食者民之本。月令則上之所授也。故以時儆其民曰。七月流火涼風至矣。九月霜降宜授衣矣。子月風寒丑月氣寒不止授衣并宜授褐。若不預爲之謀何以禦寒而卒歲乎。寅月徃修田器卯月舉足而耕丁壯在田家長同婦子而徃餉之老幼男女皆盡力於南畝庶田畯至而喜之焉。蓋教以不飢不寒。

之計也朱善曰大寒之候在於丑月而謀之於建申之時收穫之候在於酉月而慮之於建寅之日豫之至也張子曰民生本乎衣食此禮義之所以起孝弟之所以生王化之所以成也

七月流火九月授衣春日載陽有鳴倉庚女執懿筐遵彼微行爰求柔桑春日遲遲采繁祁祁女心傷悲殆及公子同歸

賦也載始也倉庚鳥名懿深美也微行小徑也柔桑

穉桑也繫菜名用以祭祁祁衆也公子女也孔穎

達曰諸侯之女稱公子是也同歸者同時而于歸也
此承上章而言九月所授丁壯之布衣也若老者衣
帛則其功更豫矣當春日始和倉庚初鳴之候女皆
執筐采桑以飼蠶將爲帛以衣其父母也又采繫以
供祭教婦職也爲女子者不言而心有傷悲知其將
與公子同時而于歸則不得久事其父母也男無不
耕女無不蠶教以勤也布以衣少帛以養老教之以

儉且知孝也采桑采繁莫不躬親教之以誠且能敬也婚姻以時貴賤同之而又以遠其父母爲悲得性情之正也然則二南之化所從來者遠矣

七月流火八月萑葦蠶月條桑取彼斧斨以伐遠揚猗彼女桑七月鳴鵲八月載績載玄載黃我朱孔陽爲公子裳

賦也萑葦蒹葭也蠶月治蠶之月也條桑枝落之而取其葉也斨斧屬遠揚高枝也取葉存條曰猗女桑

小桑也鵙伯勞也績緝麻也朱赤色陽明也此又承上章而言蠶事不始於今春也當上年七月流火之時已念及之故於八月即以萑葦爲曲薄至於今年蠶月乃大采桑或伐條而取其葉或取葉而存其條曲薄具在取而用之至便也朱善曰蠶事既成又於鳴鵙之候而績其麻以爲布蓋蠶之所成者可以供老疾給婚嫁奉君上而已非績麻以爲布則無以爲少壯者之衣也朱子曰凡蠶績之所成者皆染之或

元或黃而其朱者尤爲鮮明故用以爲公子之裳言
勞於其事而不自愛以奉其上是也蠶績分功元朱
辨色老少異衣上下殊服物采等威已開周禮之先
矣

四月秀萼五月鳴蜩八月其穫十月隕穽一之日于貉
取彼狐狸爲公子裘二之日其同載纘武功言私其縱
獻豸于公

賦也不榮而實曰秀萼苦菜蜩蟬也穫收禾也實墜

曰隕葉落曰擇于貉往取貉也同竭作以狩也續習而繼之也豕一歲曰豨三歲曰豮此章因衣食之助而及武功也天地陽極而陰生國家治久而亂伏四月純陽微陰已胎故萋感之而秀五月陽盛一陰已生故蜩應之而鳴至八月而禾黍刈收至十月而草木黃落陰盛陽衰所必然也觀天地之化而人事可知矣故兵可百年不用不可一日不備然聖人又恐養兵而費民之財也習武而妨民之事也故續武功

於衣食之間夫老者衣帛即可卒歲君公之貴又必
衣裘故於子月鬻發之時往而取貉又取狐狸爲公
子裘而取獸之時巡伺捕逐禦寇緝奸之法已習於
此矣於丑月栗烈之日使丁壯同出合圍羣獲習爲
戰陣又使私其獸之小者爲養老之需獻其大者以
充祭祀賓客及君庖之用而愛親敬長之道又習於
此矣蓋聖人於農桑之間教兵戎又於兵戎之間教
忠孝故民從其化而不知國享其福而不覺也

五月斯螽動股六月莎雞振羽七月在野八月在宇九月在戶十月蟋蟀入我牀下穹窒熏鼠塞向墁戶嗟我婦子曰爲改歲入此室處

賦也斯螽蝗屬動股以股鳴也莎雞蟲名振羽以翅鳴也宇簷下也在野在宇在戶入牀下者皆蟋蟀也穹空隙也窒塞也向北牖墁塗也十月而曰改歲以建子之月爲歲首也此承上文裘褐禦寒之意而言宮室之制也萬物之出入作息與天地之陰陽寒暑

相應故五月陰生而斯螽動股感其氣也六月盛暑而莎雞振羽迎涼風也七月暑平故可在野八月露寒故宜在宇九月霜降故宜在戶十月雨雪故入牀下蓋物性通於天道也聖人觀物以宜民一夫授五畝之宅其半在田其半在邑春令民畢出如在野而動股振羽也冬令民畢入如在宇在戶而入牀下也幽民習此久矣故當十月陰盛之時其家長修理在邑之室彌其漏隙去其烏鼠塞向以當北風墜戶以

禦寒氣而語其婦子曰歲將改矣可以入此室處矣
蓋舊歲耕桑事畢宜隩處而息勞新歲微陽初生當
安靜以養之也觀天之行察物之化驗民之情協張
弛之宜而順性命之理所以爲王道也

六月食鬱及蓂七月亨葵及菽八月剝棗十月穫稻爲
此春酒以介眉壽七月食瓜八月斷壺九月叔苴采荼
薪樗食我農夫

賦也鬱棗屬蓂蓂屬葵菜名菽豆也剝擊也穫當作

護煑也煑稻米以釀酒也冬釀春熟故曰春酒介助也壽則眉長故曰眉壽壺瓠也叔拾苴麻子也荼苦菜樗惡木也此又承上文而言衣裘具矣宮室安矣則飲食之需宜有以助之且別之也果酒嘉蔬以佐梁肉所以養老者備矣瓜壺苴荼以佐䟽食所以養農夫者裕矣植果於園藝蔬於圃種瓜壺於場畔采苴荼於原野周於所務而人皆習勤矣荼苦之菜惡木之薪安於其分而俗皆尚儉矣養老者厚則人皆

知孝矣自奉者薄則人皆知弟矣勤儉孝弟教民之道莫要於此故曰禮始諸飲食其所以爲養即其所以爲教也

九月築場圃十月納禾稼黍稷重穋禾麻叔麥嗟我農夫我稼既同上入執宮功晝爾于茅宵爾索綯亟其乘屋其始播百穀

賦也場圃同地物生之時則耕治以爲圃物成之際則堅築以爲場也穀連藁秸曰禾秀實在野曰稼先

種後熟曰重後種先熟曰穆同聚也宮功官府之役也于茅往取茅也索綯以索絞茅也在邑之屋冬處之故瑾其戶所以禦風也在田之屋夏居之故覆以茅所以禦雨也乘升也播種也此章終始農事而極道其憂勤之意也言自于耜舉趾以來黍稷重穆禾麻菽麥無不播也至九月以後而納之於場同之於倉亦可以休矣而不能也私事畢而公事興矣又當上入都邑而執宮功矣宮功既畢似可以少休矣而

又不能也今年之事甫畢而明年之事又興矣於是
晝往取茅夜以索綯之升在野之屋而覆蓋之以明
春歲始當出而播百穀也今年之蠶事預計於上年
之秋明年之農事預計於今年之冬不惟終年無休
暇之日抑且終身無放逸之心念及此而所以役民
之力用民之財者宜何如珍惜之也

二之日鑿氷沖沖三之日納于凌陰四之日其蚤獻羔
祭韭九月肅霜十月滌場朋酒斯饗曰殺羔羊躋彼公

堂稱彼兕觥萬壽無疆

賦也沖沖鑿氷之聲凌陰藏氷之室蚤初旬也韭菜
名四月上旬以羔韭祭司寒之神而啟氷也肅嚴也
滌埽也朋衆也饗鄉飲也躋升稱舉兕觥大爵也此
因飲食而極言功化之盛以見王道之成也天地之
化陰陽而已四月莠萋陽極陰生十月改歲陰極陽
生陰陽微盛寒暑往來聖人爲裘以禦寒藏氷以禦
暑陰盛而藏之陽極而出之而變理之道行於日用

矣日在北陸而祭司寒西陸朝覲而獻羔韭神嗜飲

食薦其時物而祭祀之禮明於上下矣霜肅氣寒宜
有以和之場滌勞息宜有以慰之聚衆飲酒教以饗
禮使尚齒而貴爵而孝弟之道達於里黨矣饗禮既
畢一飲食而不忘君也於是殺羔羊以躋堂酌春酒
於兕觥而忠愛之忱通於上下矣羊酒之物有限忠
愛之心無窮又相率而祝之願君壽至於萬年蓋天
以生物爲心君以仁民爲職人君能仁愛其民則民

皆祝君之壽欲長爲其所愛也天必錫君以壽使長仁其所生也書曰欲王以小民受天永命此之謂也

七月八章章十一句

詩序曰七月陳王業也周自后稷以農事開基公劉克篤前烈王業之本實始於此周公以成王未知稼穡之艱難故陳后稷公劉風化之所由使矇瞍朝夕諷誦以教之其詩大義以衣食爲本農桑爲經而婚姻祭祀田獵宮室之類錯

緯於其際至於衣則尊卑異製食則老少異糧
孝親敬長之道無處不隱寓焉孟子之言王道
也期於老者衣帛食肉以爲此即孝弟之實庠
序之教不過取其義而申明之耳是故養莫大
於農桑教不外於孝弟先聖後賢其揆一也又
於其中極道農夫紅女之勤勞惡衣菲食而常
有飢寒之患乃已無衣而元黃爲公子裳狐狸
爲公子裘已無食而取大豢以獻公殺羔羊以

祝壽忠敬之心無所不至使誦此詩者知物力之艱難而深撙節之思感民心之忠敬而生愛養之意則所以謀其衣食教之孝弟經營其婚姻祭祀田獵宮室之類者自無不精且詳所謂本天德以行王道也仁厚之氣積爲嘉祥斯百姓躋於仁壽君公至於萬年而王業成矣孔子曰於七月知周公所以造周也

鵲鵲既取我子無毀我室恩斯勤斯鬻子之閔斯

比也鵯鵯惡鳥攫鳥子而食者也室鳥自名其巢也
恩愛勤勞鬻養閔憂也武王克商使弟管叔鮮蔡叔
度暨霍叔監紂子武庚之國成王嗣立周公相之三
叔以殷叛流言於國曰公將不利於孺子周公於是
東征恐成王之疑已也故賦此詩託爲鳥言曰鵯鵯
鵯鵯爾既取我之子矣無更毀我之室以比武庚既
誘三叔不可更亂王室也又言恩勤鬻子者蓋追念
文考文母鞠子之哀而痛三叔之見取且以傷天倫

有變而已無道以善全不怒而深悲之聖人之用心也

迨天之未陰雨徹彼桑土綢繆牖戶今女下民或敢侮予

比也迨及徹取也土與杜通桑根也綢繆纏綿之意牖巢之通氣處戶其出入處也下民巢下之人也言室之毀多由於陰雨設能於未雨之前取桑根以固牖戶則人孰得而毀之以比武庚叛亂將毀王室望

成王於未毀之先君臣同心以圖國政則內疑既釋
外患自消三監雖叛無能爲也

予手拮据予所將荼予所蓄租予口卒瘁曰予未有室
家

比也拮据以爪搗草也將取荼萑苕也蓄積租粟卒
盡瘁病也蘓轍曰以手將荼則至於拮据以口蓄租
則至於卒瘁予所以勤勞病瘁而不辭者以予未有
室家故也輔廣曰當時流言必以周公平日勤勞皆

爲已謀非爲王室故公言此以釋成王之疑非自誇其功也

予羽譙譙予尾脩脩予室翹翹風雨所漂搖予維音嘒嘒

比也譙譙殺也脩脩敝也翹翹危也嘒嘒急也朱子曰羽殺尾敝以成其室而未定也風雨又從而漂搖之則其哀鳴安得而不急哉以比已既勞瘁王室又未安而多難乘之則其作詩以喻王亦不得不汲汲

也

鵠鵠四章章五句

詩序曰鵠鵠周公救亂也成王沖齡踐祚未知
周公之心三監皆叛流言四起王室之危如巢
將覆矣夫肉必先腐也而後蟲生之人必先疑
也而後讒入之羣叔流言亦乘成王之危疑而
起設王之疑不釋則周之爲周末可知也故鵠
鵠之詩憂外侮之意少而弭內患之意多蓋所

以啟牖王心救亂之所由生也劉瑾曰公以貴
戚大臣獨柄國政宗社安危係於一身成王既
惑於流言故自言其功而不爲誇謂王室爲予
室而不爲嫌其嘵嘵之音皆出於忠愛之誠惟
欲悟王心而安王室並非爲一己之禍福計也
我徂東山惴惴不歸我來自東零雨其濛我東曰歸我
心西悲制彼裳衣勿士行枚蝟蝟者蠋烝在桑野敦彼
獨宿亦在車下

賦也東山所征之地也惓惓久也零落也濛雨貌裳

衣平居之服也士事也枚如箸軍士所啣以止語者

蠋桑蟲也烝發語詞敦獨處不移之貌周公東征三

年而歸作此詩以勞歸士故代之言曰我徂東山久

而不歸既已勞矣幸而得歸中途遇雨則又苦也東

歸宜喜而心西悲者軍務未畢不暇內顧既得生還

則思家念切也衣履敝垢爰製歸裝新著冠裳不事

戰陣矣蓋行間之苦身親嘗之故願勿復爲此也旋

車言邁經歷田間見蠋之在桑野悲人之在車下覩
物傷懷也古者用車戰行載衣糧止爲營衛故從軍
之士以車爲家玩獨宿車下之詞而生還之喜離家
之悲三年從軍之況瘁長途露處之蕭條皆如繪矣
我徂東山惓惓不歸我來自東零雨其濛果羸之實亦
施于宇伊威在室蠨蛸在戶町疇鹿場熠燿宵行亦可
畏也伊可懷也

賦也章首四句備述往來之苦故重言之以見感念

之深也果羸枯樓也施蔓延也果羸野生今施于宇
者室久無人閑寂如野故蔓草旅生也伊威鼠婦也
室不埽則有之蠨蛸小蜘蛛也戶無人出入則結網
當之町疃舍旁隙地也無人藝種故鹿以爲場熠燿
螢火也院落無人則終夜羣飛也田間茅屋荒蕪幽
陰亦可畏矣乃不畏而懷之者生長於斯雖極敝陋
常縈夢想也此皆其雨中車下夜闌不寐懸想之境
蓋軍士在外神遊於其家而有如目覩聖人在上神

通於其心而有如身受非周公其孰能之

我徂東山惓惓不歸我來自東零雨其濛鸛鳴于垤婦
歎于室灑埽穹窒我征聿至有敦瓜苦烝在栗薪自我
不見于今三年

賦也鸛水鳥垤蟻封也穹窒見七月天將陰雨穴蟲
先知故蟻出垤而鸛就食之遂鳴於其上也行人遇
雨其苦尤甚故鸛鳴于垤則婦歎于室憂其夫之未
至而遇雨也灑埽庭內穹窒牆垣冀其夫之將至而

接待也冀其至憂其不至而我行忽至則其喜可知
也行人初至覩物傷懷因見苦瓜繫於栗薪之上而
曰自我之不見此於今已三年矣夫苦瓜栗薪皆微
物也尚且感歎如此則父母妻子之團聚喜其見而
悲其久不見者又當何如也

我徂東山惓惓不歸我來自東零雨其濛倉庚于飛熠
燿其羽之子于歸皇駁其馬親結其縢九十其儀其新
孔嘉其舊如之何

賦也倉庚飛婚姻時也熠燿鮮明也人心喜則物有
光輝也黃白曰皇駢白曰駁誇其馬也悅其人則馬
亦可愛也綢婦人之悅也母戒女而爲之施衿結帨
也筐篚之儀或九或十言其多也此皆新婚之禮也
男女及時各遂其願其新婚者固甚美矣其舊有室
家者遠歸而聚首喜慶又當何如也離別之憂上亦
憂其憂懼會之樂上亦樂其樂所謂惟君子爲能通
天下之志也

東山四章章十二句

東山勞歸士也詩序曰一章言其完也二章言其思也三章言室家之望汝也四章樂男女之得及時也君子之於人序其情而閔其勞所以說也說以使民民忘其勞其惟東山乎朱子曰完謂全師而歸無鋒鏑之苦思謂未至而思有悽愴之懷至於室家望汝男女及時亦皆其心之所願而不敢言者上之人乃先其未發而歌

詠以勞苦之則其懽忻感激之情爲何如哉蓋古之勞詩皆如此其上下之際情志交孚雖家人父子之相語無以過之此其所以維持鞏固數十百年而無一旦土崩之患也

既破我斧又缺我斨周公東征四國是皇哀我人斯亦孔之將

賦也隋鑒曰斧方鑒曰斨樵蘇之用也四國四方之國也皇匡也將大也周公東征三年而歸軍士諒其

心而不怨也故作此詩言斧破斨缺勞亦甚矣然周
公非爲已也蓋將使四方皆歸於正則其哀我也
亦大矣朱善曰戮一人而天下服則向之不正者復
反於正矣正四國即所以哀我也蘇轍曰使周公
潔身而退以避二叔之難則其亂將及於四方如是
而周公亦清矣然未免於小也惟不嫌於自救哀斯
人之不治誅管蔡以正四方而後可以爲大也

既破我斧又缺我錡周公東征四國是叱哀我人斯亦

孔之嘉

賦也錡釜屬吡化也皇者正其事吡則化其心也嘉有禮也以禮化之也

既破我斧又缺我鋹周公東征四國是適哀我人斯亦孔之休

賦也鋹木屬嚴粲曰不言弓矢戈矛而專言斧斨者東征之役不尚殺戮若除道樵蘇則斧斨之用爲多也適聚而固之也既已化之又固結之使不變也休

息也化而固之則兵可不用矣故曰休也

破斧三章章六句

詩序曰破斧美周公也朱子曰管蔡流言以謗周公而公以六軍之衆徃而征之使其心一出於自私而不在於天下則撫之雖勤勞之雖至而從役之士豈能不怨也哉今觀此詩固足以見周公之心大公至正天下信其無一毫自愛之私抑又以見當是之時雖披堅執銳之人

亦皆能以周公之心爲心而不自爲一身一家之計蓋亦莫非聖人之徒也學者於此熟玩而有得焉則其心正大而天地之情真可見矣

伐柯如何匪斧不克取妻如何匪媒不得

比也柯斧柄也克能也媒通二姓之言者也管蔡啟商以間王室欲定管蔡之亂此如伐柯裁不材之木也欲和庶殷之心此如娶妻合二姓之好也伐柯則匪斧不克比戡亂必用兵也取妻則匪媒不得比合

好必用禮也

伐柯伐柯其則不遠我覲之子籩豆有踐

比也則法也我東人自謂也之子謂周公也籩竹器
豆木器踐行列整齊之貌言伐柯者必執柯以伐之
彼柯長短之則在此柯耳是合伐與則爲一物也周
公之東本以兵來而舉動一準於禮故東人之覲周
公者不見其干戈之維揚而但見其籩豆之有踐是
合兵與禮爲一事也蓋周公雖以兵振其威而實以

禮行其教故東人之畏其威者固衆而服其教者尤深是陳師鞠旅之中即有過化存神之道也

伐柯二章章四句

詩序曰伐柯美周公也不尚兵而以禮爲則也
衛靈公問陳於孔子孔子對曰俎豆之事則嘗聞之矣軍旅之事未之學也夫非孔子之果未學也以爲安上治民莫善於禮以禮爲國則軍旅可不用也是故以禮止亂可以去兵不得已

而用兵兵亦有禮果能以禮行兵則德威惟畏
不戰而屈人矣孔子學俎豆於軍旅之先以禮
止兵也周公踐籩豆於軍旅之際以禮行兵也
故曰先聖後聖其揆一也

九罏之魚鱒魴我覲之子衮衣繡裳

興也九罏九囊之網也鱒魴皆魚之美者衮衣上公
之服繪山龍雉火宗彝於衣繡藻采黼黻於裳也言
布九罏之網而能獲鱒魴是漁人之幸也因三監之

叛而得覲周公是東人之幸也極言衣裳之美者德與服稱愛其人並愛其服也

鴻飛遵渚公歸無所於女信處

興也遵循也渚小洲也鴻依水草故以遵渚爲得所也女東人相謂也再宿曰信成王以禮迎周公東人知其將歸也故相謂曰鴻飛則遵渚矣公歸豈無所乎今特於女信處而已

鴻飛遵陸公歸不復於女信宿

興也高平曰陸鴻離渚而遵陸將北向也季本曰雁
北向則經時不復矣言周公歸將留相王室而不復
來東也

是以有袞衣兮無以我公歸兮無使我心悲兮
賦也朱子曰承上二章言周公信處信宿於此是以
東方有此袞衣之人願其且留於此無遽迎公以歸
歸則將不復來而使我心悲也

九罍四章一章四句三章章三句

九罍留周公也夫東方非公久居之處也東人
非不知之而又心悲者則其情有所不能已也
聖人之於人也德化有以動其性禮教有以服
其心先得其所同然故人見而莫不悅之亦不
能言其所以然也後世循吏所居民愛所去民
思亦何以異此

狼跋其胡載橐其尾公孫碩膚赤舄几几

比也跋躡也胡頷下肉載則橐跲也孫讓碩大膚功

也赤舄朱履也几几安重之貌狼性奸貪前高其胡以張望則後挾其尾以助力以比管蔡欲窺伺神器乃挾武庚以爲助也公因此被謗讓其大功避居東方亦危疑之至矣而赤舄仍几几然不改其安重之度也以赤舄爲言者人心有感足容易動懼則喪屨喜則折屨故觀赤舄之几几而寵辱不驚可知也狼薹其尾載跋其胡公孫碩膚德音不瑕

比也德音令聞瑕疵也言狼既薹尾以得力則益跋

胡以進取以比管蔡既得商奄之助則愈起跋扈之心乃流言四起而公之令聞卒未嘗少有所損蓋盛德之至而天下皆信之也程子曰周公之處已也變變然存恭畏之心其存誠也蕩蕩然無顧慮之意所以不失其聖而德音不瑕也

狼跋二章章四句

詩序曰狼跋美周公也處變而不失其常也范處義曰凡有欲之類莫不可制惟聖人無欲故

天地萬物不能易也富貴貧賤死生如寒暑晝
夜相代乎前吾豈有二其心乎哉亦順受之而
已周公遠則四國流言近則成王未知而赤舄
几几不改其度非元聖其孰能若是乎

幽風七篇二十七章二百三句


程元問於文中子曰敢問幽風何風也曰變風
也曰周公之際亦有變乎曰成王疑周公則風
遂變矣非周公至誠其孰能正之哉故終之以

幽風言變之可正也變而克正危而克扶始終
不失其本其惟周公乎係之幽遠矣哉

御纂詩義折中卷九

謹案卷八第九頁前二行生于下隰刊本隰訛濕
義雖可通但對下高邱而言似當從上文作下
隰為是今改

卷九第三十頁後七行今特於女信處而已刊本
特訛持今改



覆校官檢討臣盧應

校對官檢討臣王鍾健

騰錄貢生臣張賦京

欽定四庫全書薈要

經部

御纂詩義折中卷十

詳校官原任侍講臣王燕緒



欽定四庫全書薈要卷一千八十四

經部

御纂詩義折中卷十

小雅二

詩序曰雅者正也言王政之所由廢興也政有大
小故有小雅焉有大雅焉

鹿鳴之什二之一

朱子曰雅頌無諸國別故以十篇爲一卷而謂之
什猶軍法以十人爲什也

呦呦鹿鳴食野之苹我有嘉賓鼓瑟吹笙吹笙鼓簧承
筐是將人之好我示我周行

興也呦呦和聲也苹蘋蕭也鹿呼羣而共食故以興
燕飲也嘉賓或本國之臣或諸侯之使也瑟笙所用
之樂也凡燕饗之樂皆鼓瑟而工歌吹笙以間之也
承奉也筐所以盛幣者將行也鄭康成曰飲有酬幣
食有侑幣也周行大道也朱子曰君臣之分以嚴爲
主朝廷之禮以敬為主然一於嚴敬則情或不通而

無以盡其忠告之益故先王制爲燕饗之禮以通上下之情其樂歌以鹿鳴起興而言其禮意之厚如此庶乎人之好我而示以大道也孔穎達曰古者於旅也語禮成樂備乃可以言語先王之道也

呦呦鹿鳴食野之蒿我有嘉賓德音孔昭視民不怵君子是則是效我有旨酒嘉賓式燕以敖

賦也蒿藋也德音善言也昭明也視與示同怵浮薄也敖禮容也此承上章而言嘉賓之示我周行其德

音甚爲詳明又以其盛德之儀容使人觀感而化其
浮薄有官君子皆當則而倣之以爲民之矜式則不
待言語之間而所以示我者更深矣故旨酒式燕與
之從容遊敖蓋欲觀其周旋之中禮而則倣之也范
祖禹曰式燕以教言其禮儀之從容也莊而不至於
矜和而不至於流德之純也

呦呦鹿鳴食野之芣我有嘉賓鼓瑟鼓琴鼓瑟鼓琴和
樂且湛我有旨酒以燕樂嘉賓之心

興也苓草名琴瑟堂上之樂也湛久也燕安也此通承上文周行示以言也則微示以行也夫嘉賓之言行皆出於其心設心有不樂則行有時隱而言有時倦矣故琴瑟調和旨酒無算不止養其體娛其外而已皆所以安樂嘉賓之心而欲其教示之無已也范祖禹曰食之以禮樂之以樂將之以實永之以誠此所以得其心也夫賢者豈以飲食幣帛爲悅哉

鹿鳴三章章六句

詩序曰鹿鳴燕羣臣嘉賓也古之聖賢無一事而不深其學問無一時而不修其德行無一人而不敦其性情鹿鳴之詩樂奏幣將人見其和樂而已不知所望於嘉賓者在於示我周行乞善言所以廣學問也旨酒式燕人見其款洽而已不知所資於嘉賓者在於視我則儆觀楷模所以進德行也琴瑟和湛人見其殷勤而已不知所厚於嘉賓者在於燕樂其心固心志所以

厚性情也此可以知禮樂之本矣朱子曰燕禮
云歌鹿鳴四牡皇皇者華即謂此也鄉飲酒用
樂亦然而學記又言大學始教宵雅肄三則又
爲上下通用之樂矣豈本爲燕羣臣嘉賓而作
後乃推而用之鄉人也與然於朝曰君臣焉於
燕曰賓主焉先王以禮使臣之厚於此見矣

四牡騂騂周道倭遲豈不懷歸王事靡盬我心傷悲
賦也騂騂行不止也周道大路倭遲迂遠也盬壞也

靡盬不可壞也言使臣駕此四牡行而不止道路迂遠亦云勞矣豈不思歸而偃息乎特以國家之事不可廢壞是以中心感憤雖勞而不辭也朱公遷曰傷悲於心王事之故是也蓋忠臣於王事實有不容已之至情非徒迫於勢而勉強塞責也

四牡駉駉嘽嘽駉馬豈不懷歸王事靡盬不遑啟處賦也嘽嘽喘息之貌白馬黑鬣曰駉遑暇啟跪處坐也項安世曰古者席地跪即起居則坐是也因其心

有傷悲故其身不遑處勞之至也

翩翩者騅載飛載下集于苞栩王事靡盬不遑將父

興也蘇轍曰騅祝鳩孝鳥也春秋傳曰祝鳩氏司徒也教孝者也是以孝子不獲養而稱焉騅之飛也則亦下而集于栩不似使者之久行不返不獲養父母也

翩翩者騅載飛載止集于苞杞王事靡盬不遑將母

興也杞枸杞也先下而後止集之勢也先父而後母

言之序也

駕彼四駱載驟駸駸豈不懷歸是用作歌將母來諗

賦也驟馬行疾也駸駸驟貌諗告也此通承上文言

駕此嘽嘽之駱馬驟彼倭遲之周道豈不思歸而將

父母乎而不敢言也人君知其不敢言也用是於燕

饗之時作爲詩歌以道其意如使臣以將母之情來

告者臣不自言而君代言之上下之間可謂各盡其

道矣君子是以知樂歌之不可已也郊廟之歌所以

達神人之意也燕饗之歌所以宣上下之情也是故
禮行而分定樂作而志通

四牡五章章五句

詩序曰四牡勞使臣之來也春秋傳曰所以章
使臣之勤也夫使臣奉命馳驅不敢顧父母者
事上之義也所以盡忠也而人君念其勤勞憂
其不能將父母者恤下之恩也所以教孝也勞
於王事雖不顧養而勇戰敬官不辱其親則盡

忠乃所以全孝也將母來諗似非急公而既達其情遂忘其苦則教孝乃所以作忠也故四牡之義行則君臣之道兩得之矣

皇皇者華于彼原隰駢駢征夫每懷靡及

興也皇皇猶煌煌也高平曰原下濕曰隰駢駢疾行之貌征夫行人也此遣使臣之詩也言使臣奉命行於四方見高原下隰皆有可采之華因思大邦小國皆有可采之事是以汲汲道途常懷不及之慮蓋惟

恐諮訪有所未周也程子曰天子遣使四方以觀省
風俗采察善惡訪問疾苦宣道化於天下使人惟恐
不能宣上意而達下情是以每懷靡及也

我馬維駒六轡如濡載馳載驅周爰咨諏

賦也如濡柔密也周徧爰於咨問也諏采訪也采訪
貴於柔密故以濡興諏也

我馬維駒六轡如絲載馳載驅周爰咨謀

賦也絲條理也謀籌畫也籌畫貴有條理故以絲興

謀也

我馬維駟六轡沃若載馳載驅周爰咨度

賦也沃若明洽也度裁酌也裁酌貴於明洽故以沃興度也

我馬維駟六轡既均載馳載驅周爰咨詢

賦也均齊一也詢僉和也書曰弗詢之謀勿庸是也僉和歸於齊一故以均興詢也

皇皇者華五章章四句

詩序曰皇華君遣使臣也春秋傳穆叔如晉晉
侯享之金奏肆夏之三不拜工歌文王之三不
拜歌鹿鳴之三三拜韓獻子使行人問之對曰
三夏天子所以享元侯也使臣不敢與聞文王
兩君相見之樂也臣不敢及鹿鳴君所以嘉寡
君也敢不拜嘉四牡君所以勞使臣也敢不重
拜皇皇者華君教使臣曰必咨於周臣聞之訪
問於善爲咨咨親爲詢咨禮爲度咨事爲諏咨

難爲謀臣獲五善敢不重拜夫咨訪固使臣之大務然必問於善人乃可以徵信否則所訪不實爲害滋大故曰訪問於善爲咨也周禮小行人之職萬民之利害爲一書有咨事之義焉禮俗政事教治刑禁之逆順爲一書有咨禮之義焉悖逆暴亂作慝犯令者爲一書札喪凶荒厄貧爲一書有咨難之義焉康樂和親安平爲一書有咨親之義焉然則叔孫之釋此詩其必有

所傳矣

常棣之華鄂不韡韡凡今之人莫如兄弟

興也常棣移也鄂與萼同不與拊通萼足也常棣之華萼拊攢生相比發榮故韡韡然人與兄弟相親相助家道乃興故遍閱世人未有如兄弟者也

死喪之威兄弟孔懷原隰裒矣兄弟求矣

賦也威畏也裒與衰同長也言兄弟勝於他人平時或不知也一值變故則知之矣死喪可畏人之所惡

惟兄弟懷之或卒於外原隰路長惟兄弟求之夫其懷之而求之者蓋天性之親實有所不容已焉此非他人之所得與也

脊令在原兄弟急難每有良朋況也永歎

興也脊令水鳥況與况同言脊令之性飛則鳴行則搖失水在原鳴搖更甚兄弟之急難者似之蓋天性之親一聞有難則必急救號呼奔走無不爲也當此之時雖有良朋心相關切不過恍然長歎而已不能

力救也蓋親疎厚薄理之自然良朋亦有兄弟不能
薄所厚而厚所薄也

兄弟閱于牆外禦其務每有良朋烝也無戎

賦也閱鬪也務當作侮烝衆戎爭也言兄弟即不幸
而反目鬪於牆內然苟有外侮則同出禦之每有良
朋不過周旋解釋勸其無爭而已不能出身爲禦也
則是不令之兄弟猶勝於相好之他人也

喪亂既平既安且寧雖有兄弟不如友生

賦也此承上文言喪亂之時雖有良朋不如兄弟幸
以急難禦侮之故喪亂平矣不止身安亦且家寧豈
可視兄弟反不如友生乎歐陽修曰此責之之辭所
謂弔其不咸也

賓爾籩豆飲酒之飫兄弟既具和樂且孺

賦也賓陳飫饜食具俱也孺孩提之狀也此承上章言
兄弟不如友生者不過謂飲食燕會非朋友無可與
娛耳試思籩豆既陳飲食饜飫之時使兄弟與朋友

俱在則天倫之愛既極和樂且不事文貌有孺子嬉
戲之歡不更勝於朋友乎

妻子好合如鼓瑟琴兄弟既翕和樂且湛

賦也翕合也湛久也此承上章言間兄弟之愛者外
有朋友內則妻子世之親妻子而疎兄弟者多矣試
思妻子之相好如瑟琴之調和信可樂也設兄弟閱
牆其樂豈能久乎故必兄弟與妻子翕合而後可久
樂也

宜爾室家樂爾妻帑是究是圖亶其然乎

賦也帑與孥同究察圖思亶信也此承上章言兄弟
翕而後樂可久則是宜爾室家者兄弟也樂爾妻帑
者兄弟也總而言之急難禦侮是共憂患者莫如兄
弟也且孺且湛是共安樂者亦莫如兄弟也試詳察
而深思之豈不信然乎哉呂祖謙曰告人以兄弟之
當親未有不以爲然者也苟非是究是圖實從事於
此未有知其誠然者也不誠知其然則所知者特其

名而已矣凡學蓋莫不然

常棣八章章四句

詩序曰常棣燕兄弟也朱子曰此詩首章言至親莫如兄弟次章以意外不測之事言之以明兄弟之情其切如此三章但言急難則淺於死喪矣四章又以其情義之甚薄而猶有所不能已者言之其序若曰不待死喪但有患難便當相助又不幸而至於或有小忿猶必共禦外侮

其所以言之者雖若遞輕而所以著夫兄弟之
誼者益深且切矣至於五章言安寧之後乃謂
兄弟不如友生則是至親反爲路人而人道或
幾乎息矣故下兩章乃復極言兄弟之恩異形
同氣死生苦樂無適而不相須之意卒章又申
告之使反覆窮極而驗其信然可謂委曲漸次
說盡人情矣讀者宜深味之

伐木丁丁鳥鳴嚶嚶出自幽谷遷于喬木嚶其鳴矣求

其友聲相彼鳥矣猶求友聲矧伊人矣不求友生神之聽之終和且平

興也丁丁衆人伐木之聲嚶嚶兩鳥之和聲也幽深遷升喬高相視矧況也神之敬之也聽之從之也伐木者斲削以成材交友者切劘以成德故三章皆以伐木起興也又言鳥出深谷升於高木而嚶嚶其鳴者鳥以同類爲朋欲其同聲相應故以己之聲求友之聲也夫鳥也而猶求友之聲豈人也而不求友之

言乎果能虛心求友敬其人如神明聽其言而從之
則友以直言相規我不忤而順受彼此之心皆歸於
和且日聞正言日生嚴憚則意氣不覺自平既和且
平則心日即於謙卑德日進於高明如鳥之出幽谷
而遷喬木也爾雅曰丁丁嚶嚶相切直也得此詩之
意矣

伐木許許醺酒有藇既有肥羜以速諸父寧適不來微
我弗顧於粲灑埽陳饋八簋既有肥牡以速諸舅寧適

不來微我有咎

興也朱子曰許許衆人共力之聲醺酒涕之而去其糟也與美貌矜小羊也速召也諸父朋友之同姓而尊者也微無顧念也於歎詞粲鮮明貌八簋盛食也諸舅朋友之異姓而尊者也先諸父而後諸舅親疎之序也言具酒食以樂朋友如此寧使彼適有故而不來無使我恩意之不至也孔子曰所求乎朋友先施之未能也此可謂能先施矣

伐木于阪醺酒有衍籩豆有踐兄弟無遠民之失德乾
餽以愆有酒滑我無酒酤我坎坎鼓我蹲蹲舞我迨我
暇矣飲此滑矣

興也衍多也踐陳列也兄弟同異姓之等輩者無遠
皆在也先諸舅而後兄弟者尊卑之等也乾餽食之
薄者愆過也朱子曰人所以失朋友之義者非必有
大故或以乾餽之薄不以分人遂至於有愆是也滑
亦醺也酤買也坎坎鼓聲蹲蹲舞貌燕禮一獻既畢

皆坐而飲酒其爵無算其樂無算是也迨及也迨我
暇而飲滑者當其未暇不敢以宴樂廢事及其既暇
不敢以乾餱失德故迨暇以會友因友以求言欲其
神聽和平非徒以飲酒爲樂也

伐木三章章十二句

伐木燕朋友也天下之道五倫而已下之人非
此無以爲學上之人非此無以爲治君臣與父
子並重故不以私恩緩公義亦不以公義廢私

恩此鹿鳴四牡皇華之義也兄弟與朋友相衡
故不可忘天合之恩而等兄弟於朋友又欲其
盡人合之義而待朋友如兄弟此常棣伐木之
義也風首夫婦正其本也小雅之始而君臣父
子兄弟朋友之義著焉五倫之道備矣人倫之
至可以通神明而光四海所由繼以天保也子
思之言道也造端乎夫婦繼之以子臣弟友而
遂及於鬼神其詩教也夫

天保定爾亦孔之固俾爾單厚何福不除俾爾多益以
莫不庶

賦也保護定安也爾謂君也謂君爲爾者稱天以爲
言也固堅也單盡也除階也言其升也易曰貞吉升
階是也庶衆也此人臣頌祝其君也言人之福受之
於君君之福受之於天今天之福爾則甚固矣所謂
固者內植其基俾爾有單厚之德其福遞升也外多
其助俾爾受親賢之益其福日衆也

天保定爾俾爾戩穀罄無不宜受天百祿降爾遐福維
日不足

賦也戩盡穀善也言德性單厚故所行無不盡善有
以宜民人而受天祿天遂降以遐福而維日不足此
所謂何福不除也

天保定爾以莫不興如山如阜如岡如陵如川之方至
以莫不增

賦也興盛也高平曰陸大陸曰阜大阜曰陵岡者陵

之有石者也言福之積而高也川之方至言初來也
初來雖小續流則大言福之繼而長也此所謂以莫
不增也

吉蠲爲饔是用孝享禴祠烝嘗于公先王君曰卜爾萬
壽無疆

賦也朱子曰吉言諏日擇士之善蠲言齋戒滌濯之
潔饔食也享獻也宗廟之祭春曰祠夏曰禴秋曰嘗
冬曰烝公先公后稷以下也先王太王以下也君通

指先公先王也卜予也君曰卜爾尸傳神意以嘏主人之詞

神之弔矣詒爾多福民之質矣日用飲食羣黎百姓徧爲爾德

賦也弔至詒遺質實也黎黑也髮黑故曰黎此承上文而推原之言多福之來非無故也天視天聽在神與民爾能吉蠲孝享忠信於鬼神故祖考來格而遺爾多福矣至民則質樸無文日用飲食而已似不能

爲爾助者然安耕鑿之常見爾愛養之至留風氣之
古見爾治化之醇其不爲爾德正所以爲爾德也至
於羣黎百姓徧爲爾德則神佑而天降之福矣蓋神
者天之耳目民者天之心也養民而致敬於神此自
求多福之本也

如月之恒如日之升如南山之壽不騫不崩如松柏之
茂無不爾或承

賦也恒弦升出也日月往來言久照也騫移也山亘

古而常在不移不虧也松柏之葉新舊相承言長生也此承上文言神人皆和故自天申之也前言福之多此言福之久多而且久所謂亦孔之固也

天保六章章六句

詩序曰天保下報上也九如之祝工於頌禱而非諛詞也觀鹿鳴以下五詩君之所以待其臣者誠心藹惻非所謂單厚乎親賢之佐内外交助可不謂多益乎又推本於神人之協應則所

以惠於宗公而誠和萬民者其必有道矣頌祝之中而不忘規箴此古人之所以愛其君也

采薇采薇薇亦作止曰歸曰歸歲亦莫止靡室靡家玁狁之故不遑啟居玁狁之故

興也薇菜名作初出土也莫晚靡無玁狁北狄也此因玁狁作難而遣戍也言啟行之時薇始出土計其歸期遠在歲暮所以舍其室家而不遑啟居者皆因玁狁之故也程子曰毒民不由其上則人懷敵愾之

心矣又曰古者戍役兩期而還今年春暮行明年夏
代者至復留備秋至十一月而歸每年秋兩番戍者
皆在疆圉也

采薇采薇薇亦柔止曰歸曰歸心亦憂止憂心烈烈載
饑載渴我戍未定靡使歸聘

興也柔始生而弱也烈烈憂貌聘問也言戍人在途
薇亦柔矣念歸期之遠而憂勞之甚然戍事未定則
當一意前往無使歸問室家蓋不欲以家事累其心

也

采薇采薇薇亦剛止曰歸曰歸歲亦陽止王事靡盬不
遑啟處憂心孔疚我行不來

興也剛既成而剛也陽十月也嫌於無陽故曰陽也
言戍人至邊薇亦剛矣既至戍所見疆場之多難是
以不遑寧處而憂心成疾自謂此行不復望歸矣蓋
在途止憂身至戍則憂國以王事爲重故竭力致死
無還心也

彼爾維何維常之華彼路斯何君子之車戎車既駕四
牡業業豈敢定居一月三捷

興也爾華盛貌路戎車也君子謂將帥也業業壯也
捷勝也此敵來而交戰也以華興路非止美其車也
戎事倥偬而熟視常華見軍心之暇也三軍環列而
屬目路車見軍容之整也戎車既駕而四牡皆壯見
軍力之齊也以此節制之師加之以忠勇奮不顧身
而無敢安處則可以一月之間三戰而三捷矣

駕彼四牡四牡騤騤君子所依小人所腓四牡翼翼象
弭魚服豈不日戒獫狁孔棘

賦也騤騤強也依憑也腓避也古之用車也戰則資
衝突行則載衣糧止則爲營衛是將士之所憑依而
兵卒之所倚以避患也翼翼行列整齊之貌象弭以
象骨飾弓梢也魚服以魚皮爲矢服也戒警棘梗也
此言既勝而戒備也言雖一月三捷不可驟勝而驕
止則聯其車馬嚴其營衛行則整其行列精其器械

蓋言戒也其所以無日不戒者以獫狁勁敵叢集爲梗止而不戒則恐其攻我無備行而不戒則恐其擊我情歸也

昔我往矣楊柳依依今我來思雨雪霏霏行道遲遲載渴載饑我心傷悲莫知我哀

賦也此承上文言既已三捷又能日戒乃可以全師而歸矣因憶往時楊柳乃薇作薇柔之日來時雨雪正歲暮歲陽之候往時憂心載饑載渴來行舊路饑

渴猶前戰守之勞道途之困我心傷悲亦云哀矣而非人之所能知也夫下之人既已哀矣而又莫知其哀則其哀更甚矣乃上之人知其哀矣而又知其悲莫知則知更深矣首章諭以不得已之意末章體以不忍人之心於此見先王之仁也

采薇六章章八句

詩序曰采薇遣戍役也夫戍役之苦莫甚於啟行有離別之悲在途有饑渴之困至戍有戰守

之勞而上之人皆預知之矣戍役之功莫大於
未戰有忠奮之心將戰有整暇之度既戰有警
戒之思而上之人皆預言之矣於體恤之中而
詳爲訓誡此上世之民所以有勇而且知方也
我出我車于彼牧矣自天子所謂我來矣召彼僕夫謂
之載矣王事多難維其棘矣

賦也牧郊外也棘急也此勞將帥而追敘其功也言
車出在牧而將尚未來入受命也自天子所而但謂

我來不言所命其謀秘也召僕夫而謂之載即日啟
行也又言王事之多而且急者督軍士使速行也謀
秘而行速用兵之要道也

我出我車于彼郊矣設此旄矣建彼旄矣彼旛旄斯胡
不旆旆憂心悄悄僕夫况瘁

賦也郊在牧內蓋前軍在牧而後軍在郊也龜蛇曰
旄後軍所建旄注旄於干首也鳥隼曰旛前軍所建
所謂前朱雀而後元武也旆旆飛揚貌旛旄皆旆旆

者前軍後軍同日啟行也憂心悄悄不敢言也秘之至也僕夫况瘁不敢息也速之甚也

王命南仲往城于方出車彭彭旂旐央央天子命我城彼朔方赫赫南仲玁狁于襄

賦也南仲天子所命之將也朔方北方荒服之外也彭彭衆貌交龍曰旂左軍所建也央央鮮明貌赫赫威也襄除也言軍士北行不知所為將至朔方而後知王命南仲往城于方也築城而出車建旂者營衛

於外乃版築於內也朔方既城矣乃言天子命我止
城朔方其宣城朔方之命者正所以秘伐西戎之謀
也朔方城而獫狁之患除者據其要害則形格勢禁
不敢輕動也

昔我往矣黍稷方華今我來思雨雪載塗王事多難不
遑啟居豈不懷歸畏此简书

賦也華秀也黍稷方華初秋也載滿塗路也歸塗遇
雪初冬也秋出而冬還者謀秘而行速比獫狁聞之

而城已完也城畢而歸可以緩矣又速行而不遑啟
居者以王事多難不止朔方當日自天子所又有所
受之簡書在焉故不敢歸也城畢言歸中途乃言不
歸又不明言所以不歸之故秘之至也

嘒嘒草蟲趯趯阜螽未見君子憂心忡忡既見君子我
心則降赫赫南仲薄伐西戎

賦也蟲鳴螽躍深秋也初秋出車秋末相思不敢望
歸而未幾即歸故喜之也南仲未歸而先有歸者何

也數千里而襲人不可以多兵故簡精銳以西行餘
衆皆南還也室家相見而始知伐西戎者南還行緩
西伐行速比至家而捷音已來矣速之至也

春日遲遲卉木萋萋倉庚喈喈采芣祁祁執訊獲醜薄
言還歸赫赫南仲玁狁于夷

賦也卉草萋盛也卉木萋而倉庚鳴初春也采芣祁
祁室家和平也征夫在途而室家和平者捷音已至
故心安也訊當訊問之人爲首者也醜類也同謀者

也執之獲之西戎服也去秋出車今春還歸數月而城伐之事皆竣者謀秘而行速故也夷平也西戎服而獫狁平者剪其黨與則勢孤力弱永不爲難也

出車六章章八句

詩序曰出車勞還帥也外夷之爲中國患者西北二邊而已北狄強而不富西戎富而不強兩者合則爲害滋大故欲制獫狁必伐西戎然伐之則恐獫狁之救之也朔方介戎狄之間城朔

方則西北之路不通然城之又恐獫狁之爭之
也此其謀不可以不秘而行不可以不速故出
車之時並不言城朔方突至其地而城之獫狁
不及爭也既城之後並不言伐西戎出其不意
而伐之不惟獫狁不及救西戎亦不及防也朔
方城西戎服則獫狁之患自息所謂不戰而屈
人也君明而斷將智而勇伐交攻心出奇制勝
之道皆具矣迨其後也漢建朔方之郡唐築受

降之城猶師昔人之遺智焉詩教豈不大哉

有杖之杜有皖其實王事靡盬繼嗣我日月陽止女
心傷止征夫遑止

興也皖實圓貌嗣續也陽十月也遑暇也此勞軍士
而代述其情也言特生之杜尚然有實而行役之人
乃獨無家曾杖杜之不若也夫以王事靡盬之故而
日復一日不遑啟處此我之分所當然不敢怨也而
婦女之在家者感歲月之遲暮必遠望心傷以爲征

夫亦當休息矣蓋已念室家因念室家之亦念已也
有杕之杜其葉萋萋王事靡盬我心傷悲卉木萋止女
心悲止征夫歸止

興也杕杜有實去年秋末戍事將畢故望其暇杕杜
有葉今年春暮戍人將還故望其歸也王事靡盬我
心傷悲征夫憂王事也公義也卉木萋止女心悲止
室家憂征夫也私情也兩者固並行而不悖也

陟彼北山言采其杞王事靡盬憂我父母檀車幘幘四

牡瘡瘡征夫不遠

賦也登山采杞望父母也望父母則知父母之憂已
矣以王事之故而悲我室家固人情所難堪也以王
事之故而憂我父母尤天性之至戚也且夫父母之
憂子則無所不至矣自此至篇末皆所憂之事也憂
其車之憊憊而將敝矣憂其馬之瘡瘡而已疲矣車
馬如此人何以堪則征夫庶幾不遠而將歸乎望之
之詞也

匪載匪來憂心孔疚期逝不至而多爲恤卜筮偕止會
言近止征夫邇止

賦也載裝逝往恤憂偕俱會合也此承上章言車敝
馬疲人不能遠則宜如期而來乃不裝載而來固已
憂心甚病至於過期而猶不至則百端交集矣安與
否與存與亡與龜卜著筮相襲俱作言合於繇而皆
曰近矣乃信征夫之果邇而不遠矣范處義曰以卜
筮終之見憂之切而無所不爲也

杖杜四章章七句

詩序曰杖杜勞還役也范處義曰出車勞還率
故美其功杖杜勞還役故極其情是也夫行人
思家更思其家之思已遊子憂親更憂其親之
憂已此已曲盡人情矣乃上之人知其思家并
其思家之思已而亦知之知其憂親并其憂親
之憂已而亦知之知其勤勞王事則思有以勸
其忠知其念切父母則思有以全其孝下知上

之體恤倍至而悅以犯難不敢自愛其死上知
下之骨月情深而仁以止殺不欲輕用其力則
亦無之非教矣此所以爲聖人之經也

南陔

詩序曰南陔孝子相戒以養也有其義而亡其
辭朱子曰此笙詩也鄉飲酒禮鼓瑟而歌鹿鳴
四牡皇皇者華然後笙入堂下磬南北面立樂
南陔白華華黍燕禮亦然

鹿鳴之什十篇一篇無辭凡四十六章二百九十七句

白華之什二之二

朱子曰毛公以南陔以下三篇無辭故升魚麗以足鹿鳴什數而附笙詩三篇於其後因以南有嘉魚爲次什之首今悉依儀禮正之

白華

詩序曰白華孝子之潔白也朱子曰笙詩也說

見上篇

華黍

詩序曰華黍時和年豐宜黍稷也朱子曰亦笙詩也

魚麗于罍鱣魚君子有酒旨且多

興也罍筍也鱣揚也鯨鮪也筍小而所獲者大見魚之多也酒燕之通名統殽羞而言也旨美也旨且多言備物也朱子曰此燕饗通用之樂歌即所薦之羞

而極道其旨且多見主人禮意之勤以優賓也

魚麗于罍魴鱧君子有酒多且旨

興也鱧鮓也多且旨言適口也

魚麗于罍鰾鯉君子有酒旨且有

興也鰾鮓也具難得之物曰有春秋書多麋傳曰魯所有也又書有蜃傳曰魯所無也由是推之所有之物託其多所無之物託其有有而多之易無而有之難故有勝於多也

物其多矣維其嘉矣

賦也物欲其多又恐雜取之而不精故尚其嘉也

物其旨矣維其偕矣

賦也物欲其旨又恐味偏勝而不和故尚其偕也

物其有矣維其時矣

賦也物欲其有又恐強求之而違性故尚其時也蘇轍曰多而能嘉旨而能偕有而能時言曲全也

魚麗六章三章章四句三章章二句

詩序曰魚麗美萬物盛多能備禮也黃佐曰瓠
葉采烹兔斯燔炙聖人取焉魚麗之燕無乃過
於侈乎易曰大烹以養聖賢夫養賢所以養天
下也故聖王重之燕饗所以致其交也故賢士
安之燕之於寢饗之於廟禮以食之樂以樂之
猶殷殷若有不及也故魚麗則備物以優賓瓠
葉則薄物必與賓共彼述主人之謙詞此達主
人之誠意也

由庚

詩序曰由庚萬物得由其道也燕禮笙奏南陔
白華華黍畢乃間歌魚麗笙由庚朱子曰間代
也言一歌一吹也

南有嘉魚烝然罩罩君子有酒嘉賓式燕以樂

興也嘉美也烝衆也罩筐也所以籠魚者罩罩以罩
罩之也此亦燕饗通用之樂歌言南方有嘉魚則羣
然罩之矣國中有賢人則多方求之矣賢者知其誠

心求之故來燕而樂之也

南有嘉魚烝然汕汕君子有酒嘉賓式燕以衍

興也汕櫟也所以撩魚者范處義曰魚恐其逸故罩之使入也魚恐其伏故汕之使出也陸佃曰君子求賢上籠之如罩下撩之如汕衍飽貌易曰飲食衍衍是也君子誠於用賢故賢人樂之而至於醉飽也

南有樛木甘瓠纍之君子有酒嘉賓式燕綏之

興也甘瓠瓠之甘者樛木下垂而甘瓠纍之以興君

子誠於下賢而賢人附之也上下之情互相依附故
賢人之心安焉不復有去志也

翩翩者騅然來思君子有酒嘉賓式燕又思

興也騅孝鳥然衆也曹粹中曰始言然然罩罩然然
汕汕終言然然來思惟其始之求之者衆故其終致
來者亦衆也賢人繼來而君子又燕好賢無已也

南有嘉魚四章章四句

詩序曰南有嘉魚樂與賢也夫賢者豈徒以燕

飲為樂哉必以禮羅而致之所謂罩罩也用其道而顯其身所謂汕汕也上下交而志通情誼結而不解所謂木樛而瓠纍也一賢人安之衆賢人慕之於是乎來之者無已而燕之者亦無已則多士濟濟而庶績咸熙矣故君子之治其國家無他道也誠於求賢樂與之處而已矣

崇丘

詩序曰崇丘萬物得極其高大也燕禮歌南有

嘉魚笙崇丘

南山有臺北山有萊樂只君子邦家之基樂只君子萬壽無期

興也以山之有草木興君子之有德壽也臺莎萊藜基本也實心實政以立其本故曰基也能爲邦家之基則其壽宜無窮矣此賓祝主人之詞也

南山有桑北山有楊樂只君子邦家之光樂只君子萬壽無疆

興也德輝文治蔚爲國華故曰光也

南山有杞北山有李樂只君子民之父母樂只君子德
音不已

興也此承上二章言所以爲邦家之基者善政養民
爲民之父母故也所以爲邦家之光者善教覺民其
德音不已故也

南山有栲北山有杻樂只君子遐不眉壽樂只君子德
音是茂

興也栲山樗杻櫪也此承德音不已也言不已之久則日新月盛而德音益茂所以爲邦家之光者彌彰矣

南山有枸北山有楸樂只君子遐不黃耇樂只君子保艾爾後

興也枸枳枸楸苦楸也黃髮黃也耇老艾養也此承民之父母也言父母斯民之政樂利無窮不止保黎民並保子孫也首二章之祝壽願之也有是德宜有

是壽也末二章之祝壽必之也既有是德斷無不得是壽也

南山有臺五章章六句

南山有臺下報上也魚麗嘉魚主人樂賓此則賓樂主人也樂只君子即有酒之君子也樂其燕而祝其壽非諛也民者天所生也君者治民者也父母以養之德音以教之則民壽矣君壽天之所生則天亦壽其生生者此自然之理也

天保之報上也曰萬壽無疆而歸本於羣黎徧
德有臺之報上也亦曰萬壽無疆而歸本於民
之父母天人之際可以觀矣

由儀

詩序曰由儀萬物之生各得其宜也燕禮歌南
山有臺笙由儀

蓼彼蕭斯零露漙兮既見君子我心寫兮燕笑語兮是
以有譽處兮

興也蓼長貌蕭蒿也嚴粲曰諸侯以蕭自喻君臣之
辭也滑露潤貌鄭康成曰君子天子也寫抒也蘇轍
曰諸侯來朝天子推恩以接之無所不及如零露之
於蕭然故其既見天子也莫不思盡其心之所有以
告之天子又申之以燕禮極其笑語之樂而無間是
也譽名也處安也燕語嘉獎則諸侯之聲名益著是
以有譽也燕語款洽則諸侯之祿位益安是以有處
也

蓼彼蕭斯零露瀼瀼既見君子爲龍爲光其德不爽壽考不忘

興也瀼瀼露蕃貌龍寵也光榮也燕而受天子之寵眷其光榮莫大焉爽差也不爽心服其德也呂祖謙曰德施之普使遠近大小親疎各稱其分莫不滿足是也壽考不忘諸侯頌天子之詞欲其億萬斯年常如此不爽也

蓼彼蕭斯零露泥泥既見君子孔燕豈弟宜兄宜弟令

德壽豈

興也泥泥露濡貌孔盛也豈愷切弟樂易也言燕禮甚盛其語愷切其情樂易也兄弟諸侯之在燕者也天子猶父母也諸侯猶兄弟也天子豈弟之德洽於諸侯諸侯化之亦互相親睦是諸侯之兄弟相宜皆天子有以宜之也諸侯沐天子之令德故祝其壽而且豈欲其億萬斯年常如此豈弟也

蓼彼蕭斯零露濃濃既見君子條革冲冲和鸞雝雝萬

福攸同

興也濃濃露厚貌倬革馬轡冲冲調適也和鸞車鈴
在軾曰和在鑣曰鸞雖離和聲也此天子既燕諸侯
而賜之以車馬也采菽之詩曰君子來朝何錫予之
雖無予之路車乘馬是也韓奕之詩曰王錫韓侯簠
第錯衡鞞鞞淺幘皆車飾也和鸞之屬也又曰鉤膺
鏤錫倬革金厄皆馬飾也倬革其著也攸所也同聚
也既燕樂之又錫予之德意之厚如零露之濃然則

萬國諸侯皆愛戴天子矣萬國之所歸即萬福之所同也

蓼蕭四章章六句

詩序曰蓼蕭澤及四海也易曰地上有水比先王以建萬國親諸侯夫天子深居九重與海隅蒼生至隔遠也故衆建諸侯以治之天子親諸侯使諸侯各親其國則萬國與一人相比而無間矣蓼蕭之詩燕語龍光天子親諸侯也壽考

同福諸侯親天子也宜兄宜弟諸侯自相親也
諸侯親天子又自相親同宣天子之德意以親
其民故恩誼聯於堂陛則膏澤洽於四海非虛
言也左傳昭公十二年宋華定來聘享之爲之
賦蓼蕭弗知又不答賦昭子曰燕語之不懷寵
光之不宣令德之不知同福之不受將何以在
由昭子之言繹之是有譽處懷燕語也其德不
爽宣寵光也宜兄宜弟昭令德也萬福攸同祝

天子之受之也亦可以知此詩之義矣

湛湛露斯匪陽不晞厭厭夜飲不醉無歸

興也湛湛露盛貌陽日也晞乾也厭厭安也亦久也
足也夜飲私燕也楚茨之詩曰備言燕私是也歐陽
修曰湛湛之露潤霑於庶物非至曙則不乾厭厭之
飲恩被於諸侯非至醉則不止見天子待諸侯之厚
也

湛湛露斯在彼豐草厭厭夜飲在宗載考

興也豐茂也宗宗室也路寢之屬燕禮膳宰具官饌
於寢東是也考成也劉瑾曰在宗室而成燕禮也朱
公遷曰露在豐草則膏澤深飲在宗室則恩意隆也
湛湛露斯在彼杞棘顯允君子莫不令德

興也顯明允信也謝枋得曰顯者其心明達信者其
心忠誠也朱子曰君子諸侯之爲賓者也令善也令
德謂其飲多而不亂德足以將之也蘇轍曰露之在
草也如將不勝其在木也則能任之矣將言其無不

醉故以豐草言之將言其醉而不亂故以杞棘言之也

其桐其椅其實離離豈弟君子莫不令儀

興也離離垂也令儀言醉而不失儀也蘇轍曰椅桐雖實繁而枝不披君子雖至醉而儀不亂陸佃曰杞棘剛木故以況令德椅桐柔木故以況令儀也輔廣曰明信者固宜有堅定之令德樂易者則恐其或略於威儀豈弟而有令儀此所以為成德也既醉則情


或佚矣在宗則儀可略矣然而莫不令儀此所以爲成禮也黃樵曰上之所以繩下者愈寬下之所以自繩者愈嚴君有餘恩臣有餘敬也

湛露四章章四句

詩序曰湛露天子燕諸侯也春秋傳甯武子曰諸侯朝正於王王燕樂之於是乎賦湛露則天子當陽諸侯用命也曾鞏曰前言厭厭夜飲後言令德令儀雖過三爵亦可謂不繼以淫矣

白華之什十篇五篇無辭凡二十三章一百四句

御纂詩義折中卷十



覆校官檢討臣盧應

校對官檢討臣王鍾健

謄錄監生臣左詢